

Ndaem Faex Ndaej Mak

□ Danz Hijvah / 譚喜花

Simjngux dingq le youq baih-haenx fok naeuz: “Mwngz fatbag lu ma? Mwngz mbouj siengj aeu yah lu ma? Daj meh mwngz gvaqseiq le, daxboh mwngz geij bi neix daeuj vih gij saehcingz mwngz simfanz yaek dai, byoemgyaeuj hau caez. Veiz Gangh mbouj lumj mwngz, de ndang sang youh baenzmbauq, daihbaj lwgsau ceng daeuj gyaез, de faenfaen cung aeu ndaej yah. Cij lau de yawj mbouj hwnj bouxwnq, mbouj lau bouxwnq yawj mbouj hwnj de!”

Simjngux gangj daengz neix lumjbaenz lij mbouj gaij heiq, ciepdwk youh doiq Veiz Fungh naeuz: “Ndei! Ndei! Ndei! Veiz Gangh hix caengz damzyoux, cijaеu de nyienh daeuj. Gangj mbouj dingh dabsau neix caeuq de miz yienzfaenh ne, hab mwngz aeu mbouj ndaej yah!”

Simjngux doengzeiq, hoeng Veiz Gangh baihneix hainduj mbouj ngaekgyaeuj, Veiz Fungh naeuz: “Daj iq daengz seizneix gou caengz gouz bouxlawz gvaq, seizneix suenq daeggo gouz mwngz lo. Danghnaeuz ngoenz-neix mbouj fatseng gij saehcingz neix, gou caeux couh bae lo, caen doiq mbouj hwnj Simjngux caeuq dabsau haenx. Gou rox mwngz mbouj you aeu mbouj ndaej yah, mwngz bang gou dingj gvaqbae couh ndaej lo.”

Raen daeggo caensim gouz swheij bae bangfwngz, Veiz Gangh cijndei cengqgengz dapwnq lo.

Yienznaeuz caez dwg bohme seng, Veiz Gangh caeuq daeggo maj ndaej cix di he hix mbouj doxdoengz. Boux sang boux daemq, boux ndaem boux hau, boux he gyoengq lwgsau ceng daeuj maij, boux he duznengz cungj mbouj raen daeuj douh. Ngoenzbonz Veiz Fungh lij raen Mbanjlaj Dahcaet cang ndaej lengjlili daeuj ra Veiz Gangh ganggoj ne.

Dahcaet vunz lengj noh hau, gyaез gangj gyaез riu, de miz haujai daegmbauq gyaез. Dauq mbouj rox ndawsim Veiz Gangh baenzlawz naemj, de doiq Dahcaet mbouj swt saekdi. Haujai baez, Dahcaet cungj dwg naj ndinggvaenggvaeng haeb heuj dedded daemhdin baema.

Gijneix Veiz Fungh cungj yawj youq ndaw da, de naemj: Baenzlawz couh mbouj dwg gou ne? Lwg fangzraq neix ndang youq ndaw fuk mbouj rox fuk, caen huk.

Vah gangj Veiz Gangh dingq daeggo anbaiz cijndei dingj gyaеuj bae, vunz caengz daengz giz dieg raen naj couh sawqmwh dingqny i aen sing’ yaem gig sug he cienz haеuj rwz de daeuj: “Veiz Gangh!”

“Liuz Fwnh!” Ca mbouj lai song boux doengzseiz heuh hwnjdaеuj.

“Sou song boux roxnaj?” Simjngux ngeizvaeg dwk muenghmuengh dabsau coh heuh Liuz Fwnh neix, youh muenghmuengh Veiz Gangh.

“Dwg vei, daxsimj.” Liuz Fwnh riunyumnyum daihfueng han naeuz.

Loengh gyaj baenz caen, raen miz

heiq ndei lo, Simjngux song da cienqlulu hix riu naeuz: “Gou seizneix miz di saeh, lizbae yaep ndeu gonq, sou song boux youq neix menhmenh ganggoj ba.” Gangj sat cix hoemq bak caegriu doq byaijdeuz lo. Doq byaij doq naemj: Ndaem faex ndaej mak, gou baezneix guh mehmoiz guh dingh lo, caen dwg daenj vaih haizdiet ra mbouj raen, ndaej daeuj cienz mbouj feiq goengfou.

Liuz Fwnh gaxgonq caeuq Veiz Gangh youq Gvangjdungh caemh aen gunghcangj he dajgoeng gvaq. Mwh-haenx Liuz Fwnh guhhong nyinhcaen roengzrengz, mbouj geij nanz couh ndaej daez hwnj guh cujcangj, Veiz Gangh youq lajfwngz de.

Vahsug naeuz “laujyangh raen laujyangh, ndawsim fouzcingz gag miz cingz”. Liuz Fwnh doiq Veiz Gangh hix cibfaen gvansim caeuq ciuqgoq, neix hawj dahyoux Veiz Gangh Lij Yenzyenz roxnyinh gig hozndat.

Seizhaenx youq ndaw da Veiz Gangh, Liuz Fwnh yienghsiengq maj ndaej daiq bingzciengz lo, dwg cungj vunz vut youq ndaw vunz lai hix ra mbouj raen. Swheij hix dangq de lumj baengzyoux ndwi, roxnaeuz dwg laujyangh hix ndaej. Hoeng, Lij Yenzyenz cungj dungxgaeb gyaез gwn meiq, de mbouj dingq Veiz Gangh gejnaeuz, laihaeuz Veiz Gangh caeuq Liuz Fwnh miz di saeh. Naeuz gijmaz ndaw cangj daihbaj daegmbauq, couh dandan doiq mwngz baenzneix ndei, mbouj miz gij simsei wnq youh dwg maz? Mizseiz Veiz Gangh gangj mbouj gvaq Lij Yenzyenz, cijndei mbouj guhsing cang rwznuk.

Lij Yenzyenz gyaеundei, nyex vunz gyaез. Veiz Gangh simmaez Lij Yenzyenz, de caen lau baez mbouj siujsim, Lij Yenzyenz dujva gyaеundei neix couh liz de bae lo. Lij Yenzyenz dwg dahyoux de, haujai vunz hozhaenz hozhaemz de ne!

Lij Yenzyenz vunz lengj dungxgaeb, de haemz Liuz Fwnh doiq Veiz Gangh ndei, ciengzciengz youq baihnaj vunz lai daegdaengq guhyiengh hawj Liuz Fwnh yawj. De moix ngoenz caeuq Veiz Gangh mboujlwnh doxhaeuj doxok cungj dwg gaemh fwngz baengh mbaq youh gangj youh riu, yienh ndaej de caeuq Veiz Gangh doxgyaез dangqmaz.

Liuz Fwnh mbouj leixlangh gijneix, ciuqyiengh doiq Veiz Gangh lumj gaxgonq yienghhaenx, Lij Yenzyenz engqgya ndatheiq lo.

Ngoenzhaenx haetromh anbaiz guhhong seiz, Liuz Fwnh caeuq Veiz Gangh lai gangj geij coenz vah. Lij Yenzyenz sikhaek heiq goenjfoedfoed hwnjdaеuj, vix ndaeng Liuz Fwnh couh daihsing vet: “Lajmbwn daihbaj bouxsai, mwngz vihmaz dan yawj Veiz Gangh! Vihmaz aeu caeuq gou doxciengj?” Loengh ndaej gyoengq vunz lai cungj humx gvaqdaеuj yawj nauh-yied.

Liuz Fwnh simsoh gyaез bang

vunz, dwg bouxvunz simndei he. De doiq Lij Yenzyenz naeuz: “Mwngz gaej gikdoengh baenzlai, gaej luenh siengj, gou mbouj miz aen sim caeuq mwngz ciengj bouxgvan.”

Veiz Gangh hix youq dangnaj gyoengqvunz lai naeuz de ndawsim cij miz Lij Yenzyenz boux ndeu, danghnaeuz sim naemj bouxwnq, mbwn gaj dei h mied.

Raen daegyoux swheij yienghneix gangj, Lij Yenzyenz engq ndatheiq engq mbouj gangj leix lo, naeuz: “Veiz Gangh mwngz sim coh Liuz Fwnh, raen de ndei couh caeuq de gvaq ba! Gou miz haujai vunz gyaез, mbouj noix mwngz ne!

Lij Yenzyenz yienghneix baez nauh, Veiz Gangh nyapnyuk raixcaix. Doeklaeng de engq hawj Veiz Gangh saetmuengh, de caen bae caeuq daegmbauq he doxlien h lo.

Muengh dwk aen ngaеuz Lij Yenzyenz yied bae yied gyaе, Veiz Gangh ndawsim naemj: Bae couh bae ba, gou couh mbouj saenq mbouj miz mwngz Lij Yenzyenz, ngoenzcog daengngoenz couh mbouj caiq daj baihdoengh hwnjdaеuj lo.

Vah dwg yienghneix gangj, Veiz Gangh lijdwg roxnyinh gig siengsim, gvaqlaeng de hix gig vaiq lizhai gunghcangj lo.

Yienznaeuz gij saeh neix gaenq gvaqbae song bi lai, hoeng saehgaeuq byawz cungj mbouj siengj daez baenzlai. Liuz Fwnh naeuz seizhaenx Veiz Gangh lizhai le, mbouj geij nanz de hix mbouj youq gizhaenx guhhong lo. Gvaqlaeng Lij Yenzyenz caeuq boux daegmbauq haenx hix mbouj doxhuz, mbouj geij nanz couh doxfaen lo……

Dingq daengz gijneix, Veiz Gangh ndawsim miz di nanzsouh, de caensim gyaез gvaq Lij Yenzyenz, doeklaeng yienghneix rox yiemz byawz ne? Veiz Gangh gag danq gaemz heiq ndeu.

Liuz Fwnh naeuz, de nienzgeij mbouj iq lo, bohme h coi ndaej gaenj,

swheij mbouj roxnaj geijlai vunz, cijndei dingq bohme h anbaiz daeuj yawjyawj, liuh mbouj daengz youq gizneix ndaej raen Veiz Gangh.

Veiz Gangh riu naeuz: “Gou hix saedcaih siengj mbouj daengz, naemj hwnj gaxgonq, caen doiq mbouj hwnj mwngz.”

“Mbouj gangj gijneix lo, raeuz seizneix ceiq youqgaenj couhdwg yawj coh baihnaj.” Liuz Fwnh hix riu dwk naeuz.

Veiz Gangh caeuq Liuz Fwnh daj mbatneix doxraen le, de fatyienh Liuz Fwnh dwg boux dabsau simsoh caemhcai q ndaw dungx gvangqlangh he. Mbouj rox mbouj nyinh couh menhmenh gyaез hwnj de lo. Beij hwnj gij dabsau vunz lengj heiq dinj, de roxnyinh Liuz Fwnh cungj dabsau neix engq hawj de sim’an sim’onj.

Dahcaet Mbanjlaj raen Veiz Gangh caeuq Liuz Fwnh damzyoux le, hix roxsoq mbouj bae ra de lo, haemz ndaej byaij loh doxbungz cungj mbouj doxdongx. Veiz Gangh haibak dongx de gonq, de cix ngeuxgyaeuj gvaq mbiengj he bae lumj mbouj ndaejnyi nei, yienzhaeuh lumj ndoj boux baenzraq nei riengjret buetdeuz.

Miz vunz riu Veiz Gangh, dabsau lengj gag daeuj ra mbouj aeu, dauq bae gyaез lingh dah yiengh bingzciengz, caen dwg miz da mbouj miz ngvih lo.

Veiz Gangh cix riu naeuz: “Byaekheu lauxbaeg, gag boux gag gyaез, gou cij gyaез Liuz Fwnh boux ndeu. De youq ndaw da gou lengj lumj dabsien!” Bouxwnq dingq le, hix mbouj gamj gangj maz lo.

Baihde Veiz Fungh caeuq Cangh Siujyaz hix yawj hwnj da lo. Baenzneix Simjngux okmingz lo, de fanhfanh naemj mbouj daengz, guh baez moiz he cix hawj 4 bouxcoz neix baenz gvanbaz, nyex ndaej gyoengq daegmbauq mbanj gyaе mbanj gyawj cungj faenfaen hwnj dou daeuj cingj de guhmoiz nda mae.

(sat)

